


E LUS DI MUNDU

Bos di Profesia - Lès 1



KEN A TRAHA MUNDU I E HENDENAN KU TA BIBA RIBA DJE?

Versikulo di Memoria: "Na prinsipio Dios a krea shelu i tera"(Genesis 1:1).

PROBABLEMENTE tur hende a yega di puntra nan mes hopi bes: Ken a traha mundu? Ken a traha hende? Pakiko mi ta aki? Na unda E ta? Pakiko hende ta hasi piká? Kon nos por sa kiko ta bon?

E pregunta ei i hopi otro mas, nos ta bai studia den e kurso aki. Den e promé lès nos lo studia: "Ken a traha e mundu aki i hende ku ta biba den die?" Kisas bo ta biba den un kas kristian kaminda Beibel ta ser lesa regularmente: Si tá asina, lo bo gosa di mira kuantu di e preguntanan aki lo bo ta kapas na kontestá. O, kisas bo a tende masha poko di lesamentu di Beibel. Si ta asina, siguramente lo bo gosa di siña loke Beibel ta bisa tokante e asuntunan interesante i masha importante aki. Ta milagroso kuantu di e preguntanan di tur dia, ku ta den pensamentu di hende ta wórdu kontestá den Beibel.

Segun bo ta studia, lo bo mira kon komprendibel e Beibel ta bira. Maske bo no tin ningun hende pa yuda bo ku e lèsnan aki, nan lo ta asina komprendibel i fásil, ku bo mes por tuma e kurso. Hopi hende awendia ta negligishá studiamentu di Beibel. Ora bo kaba ku e kurso aki, lo bo sa muchu mas tokante e Palabra di Dios i lo bo ta kapas pa splik'é na otronan. Awor ku bo ta bai kuminsá ku e lès aki, lo bo desea na baha bo kabes i hasi orashon i pidi Dios pa E hasi' e lès mas kla pa bo por komprondé mihó?



E KREASHON

1. Ken Beibel ta bisa a traha mundu?

'Den prinsipio Dios a krea shelu i tera' (Genesis 1:1)

Mara hende por a solamente kere den e Palabranan aki di Beibel, ku ta DIOS a traha tur kos.

2. Ken a yuda den kreashon di e mundu aki?

'Promé aya Dios a papia hopi biaha i na hopi manera ku nos antepasadonan pa medio di profetanan, pero awor, den e delaster dianan, El a papia ku nos pa medio di Su Yu, Kende El a nombra komo Eredero di tur kos, pa medio di Kende tambe El a traha mundu"(Hebreonan 1:1 2).

Hesus a yuda den e obra milagroso aki di traha mundu. El a biba den shelu ku Su Tata promé ku El a bini na e mundu aki manera un mucha chikitu. Referiendo na Su més komo e Pan di Bida, un bes El a bisa na esnan ku tabata skucha: "Ami ta e Pan bibu ku a baha for di shelu" (Juan 6:51). I atrobe den Juan 17:5 "I awor, O Tata, glorifiká Mi serka Boku e gloria ku Mi tabatin serka Bo promé ku mundu a eksisti?"

Bo por mira pakiko Hesus tin tantu interés den e mundu aki; pasobra den prinsipio El a yuda trah'é.

3. Ken tabata e di tres Personanan ku a yuda den e kreashon di e mundu aki?

"I e tera tabata sin forma i bashi, i skuridat tabata riba kara di abismo. I e SPIRITU DI DIOS a move riba e kara di awanan" (Genesis 1:2).

Akinan nos ta mira ku e personanan ku ta wórdu yamá e `TRINIDAT", a koperá den e kreashon di e mundu aki. Algun hende lo bisa: "Mi a kere ku nos ta kere den ún Dios so". Sí, bèrdat; ma e mes un Dios ei ta presentá Su mes den forma di tres persona: (1) Dios Tata, (2) Dios Yu Hesus; i (3) Dios Spiritu Santu. E tresnan aki ta unu den propósito den trabou i den plan.

Laga nos pon'é di e manera aki:

- * Aki tin un kabuya. Mi ta puntra bo: "Kuantu kabuya bo ta mira? Lo bo respondé "unu". I asina tá; ma awor si bo mira ku kuidou, lo bo mira ku e ta trahá ku tres stréng, pero e ta forma un kabuya.
- * Mira un pera di lus sendé. Kuantu lus e tin? Unu! Kita e koriente afó i lo bo mira (por ehèmpel) tres waya den dje. Tog bo ta mira solamente ún lus.

Den shelu tur e tres personanan di `Trinidad tin interés den nos i nos salbashon.

4. Kuantu persona Hesus a bisa ta forma e

Trinidad? "Bai anto, i siña tur nashop, i batisá nan den nomber di Tata i di Yu i di Spiritu Santu". (Mateo 28:19).

Den e versikulo ariba menshoná, Hesus mes ta mustra masha kla ku ta tres Persona Divino ta eksistí: Tata, Yu i Spiritu Santu.

MESTER TABATIN UN KREATOR

5. Kiko Beibel ta bisa di un hende ku ta bisa, ku no tin Dios?

"E bobo a bisa den su kurason, ku no tin Dios" (Salmo 53:1).

- * Mi por mustra na un oloshi kologá na muraya i bisa: "Bo a mira kon regular e oloshi ei ta? Niun hende a trah é."
- * Mi por mustra atrobe riba un outo koriendo den kaya i bisa: "E outo ei a bini di su mes. Niun hende a trah'é Ta un par di alestik for di Singapore a forma te ora nan a bira un outo. No ta hende a traha outo."

Lo bo bisa ku e persona ei su kabes no por ta bon; ta hende bobo. Esei ta nèt loke Dios ta bisa di hendenan ku ta asina irasonabel pa bisa ku: "No tin Dios, ku e mundu aki a eksistí di su mes, i ku e palunan, e animalnan i hende mes, den promé lugar, no a wordu trahá dor di ningun ser. Ta pa kasualidat nan a eksistí".

Beibel ta deklará ku algun lo ta asina bobo pa duna krédito na animalnan komo e fuente di bida di hende, mas ku na Dios mes.

6. "Profesando di ta sabí nan a bira bobo, i a kambia e gloria di e Dios inkoruptibel pa un imagen den forma di hende koruptibel i di para i animal di kuater pia i bestia ku ta lastra. P'esei tambe Dios a entrega nan na impuresa, den e pashonnan di nan kurason, pa nan ku nan deshonorá nan mes kurpa. Pasobra nan a kambia e bèrdad di Dios pa un mentira i a adorá í sirbi e kriatura enbes di e Kreador, Kende ta bendíshoná pa semper. Amen" (Romanonan 1:22-25).

Esaki ta un bon versíkulo! Tabata menos ku shen aña pasó ku hende a kuminsá siña e idea falsu ku mundu a bini di su mes; ku e bida di animal riba e tera aki a kuminsá for di miones di añanan pasa; i ku el a sigui kambia te ora ku finalmente hende a bini na eksistensia. Ma esei no ta loke Beibel ta siña. Pablo ta deklará ku hende en realidat lo ta mas boluntario pa bisa ku animal tabata responsabel pa nan mes origen, ku duna krédito na e Kreador ku a traha nan.

ORIGEN DI ANIMAL I PALUNAN


7. Ken a traha e palunan i e animalnan den prinsipio di nos mundu?

"I Dios a bisa: Laga e tera produsí yerba bèrdè, yerba ku ta duna simia, i palu di fruta ku ta duna fruta segun su naturalesa, ku su simia ta den dje, riba tera. I tabata asina"(Genesis 1:11).

"I Dios a traha e bestianan di mondi segun nan sorto, i e bestianan di kria segun nan sorto, i tur loke ta lastra abou na suela segun nan sorto; i Dios a mira ku esaki

tabata bon" (Genesis 1:25).

Si bo lesa e promé kapítulo di Génesis lo bo mira ku Dios a traha piská, para, laman, etc. E kapítulo aki ta mustra e origen di tur forma di bida riba e tera aki; i ku Dios a traha tur kos.



8. Hende a bini for di famia animal? Si no ta asina, ken originalmente a traha hende?

"I Dios a KREA HENDE DEN SU MES IMAGEN; segun e imagen di Dios El a krea hende; homber i muhé El a krea nan" (Genesis 1:27).

Tabata DIOS ken a krea hende den promé luga den e mundu aki. El a krea hende den Su mes imágen. Bo no ta kontentu di sa ku ta Dios a krea bo, e Gobernador di e universo, enbes di kere ku bo a sali for di un animal?

ORIGEN DI E STREANAN

9. Kiko mas: Dios a traha?

"I Dios a traha dos lus grandi, e lus mas grandi [solo] pa goberna- di dia i e lus mas chikitu [luna] pa goberna anochi; Ela traha e streanan tambe" (Genesis 1:16).

10. Ken rei David a bisa a traha tur e streanan i e planetanan den e universo?

"E shelunan ta deklará e gloria di Dios, i e espasio ta mustra e obranan di Su man" (Salmo 19:1).

"Ora mi mira Bo shelunan, e obra di bo dedenan, e luna i e streanan, ku Bo a ordenó" (Salmo 8:3).

Dios no solamente ta e Kreador di nos mundu, nos luna, nos solo i e planetanan den nos sistema, pero tambe El a krea tur e otro streanan i solonan.

11. "Dor di e palabra di Señor e shelunan a wordu trahá, i dor di e rosea di Su boka, henter nan ehèrsito. Pasobra El a papia, i asina tabata; El a duna ordu, i esei a bin na eksistensia" (Salmo 33:6-9).

E versíkulo aki ta bisa nos masha kla ku Dios a papia e palabra i tur kos den e universo a bini na eksistensia.

12. Kon nos por komprondé e abilidad di Dios pa traha algu for di nada?

"Pa medio di fe nos ta komprondé ku mundu a wordu forma pa medio di palabra di Dios, asina ku e kosnan ku hende ta mira no ta trahá for di loke ta visibel" (Hebreonan 11:3).

Nos' por kompronde e kreashon
solamente pa medio di fe. No laga
nos bisa ku nos no ta kere den Dios
simpelmente pasombra nos no ta
mira Dios o komprond'e
eksaktamente kon E ta traha

ILUSTRASHON:

Laga nos imaginó ku bo tin un kachó chikitu siegu. E no por pensa manera bo ta pensa. E no por hasi e kosnan ku abo komo hende ta hasi. Lo no ta un bobedat pa bo kachó chikitu pensa ku bo no ta eksisti, únikamente pasobra e no ta mira bo óf komprondé bo? Un kolumnista di un korant a bisa un biaha: "Un persona ku ta bisa ku no tin Dios, i ku ningun Kreador ta gobernando e universo, ta manera un sapu sintá banda di riel di un tramvia; ora e motor ta pasa bai, e ta grita duru, i bisa: "No tin ningun makinista riba e lokomotif ei, pasobra nunca mi no a miré. E motor ei a bini di su mes". Ora nos mira e maravioso streanan riba nos kabes, no laga nos bisa, "Ta nan so a bini na eksistensha, i nan mes ta tene nan mes moviendo", anto mirando na e kunuku i palunan bo bisa: "Nan a bini di nan mes". No laga nos mira na nos mes i bisa: "Nos ta akinan pasobra nos a simplemente aparese i nos ta doño di nos mes".

DIOS SU MEMORIA DI KREASHON

13. Na fin di e siman di kreashon, di ki manera Dios a celebrá Su obra maravioso?

"Asina e shelunan i tera a keda kla, i tur nan ehèrsitonan. I riba e di shete dia Dios a kaba Su trabou ku El a hasi, i riba e di shete dia El a sosegá di tur Su trabou ku El a hasi. E ora ei Dios a bendishoná e di shete dia i a santifik'é, pasobra riba e dia ei El a sosegá di tur Su trabou ku Dios a krea i a traha" (Genesis 2:1-3).

Despues di a kaba ku kreashon, Dios a sosega riba e di shete dia i a bendishon'é i santifik'é. Tur e kriaturanan den e otro partinan di e universo a kanta huntu i grita di alegria na honor dje obra maravioso di kreashon di Dios.

NOS OBLIGASHON NA NOS KREADOR

14. Komo yu, kon nos mester rekordá nos Kreador? Pakiko?

"Korda di bo Kreador den e dianan di bo hubentut, promé ku e dianan malu bini, i e añanan yega ora lo bo bisa, mi no tin plaser den nan" (Eklesiastés 12:1).

Ta un bunita kos ku bo ta studiando e lèsnan aki miéntras bo ta hóben ainda. Miles di hende bieu kaba ta desea awor di por a sigui Dios tempu nan tabata mas hóben. Awor nan ta haña sa ku nan a gasta nan bida i "no tin plaser den nan".

ILUSTRASHON:

Un djarason un minister a risibi un yamada pa bai bishitá un señora na un hospital. E señora tabata sinti hopi malu. Un poko promé ku e minister a ofresé un orashon, e señora a pidi: "Hasi orashon pa mi esposo tambe. E ta un bon hómber, ma e no ta kere den Dios. E ta bisa ku no tin Dios. Hasi orashon i pidi ku e por kambia su pensamentu". E

siguiente anochi lat a bini un yamada pa e minister bai na un sierto hotèl, kaminda e esposo tabata biba. E tabata den su kamber yorando. Ora e hómber a habri e porta, el a bisa yorando: "Ai, mi esposa a muri djis despues ku mi a bis'é ayo. awe tardi. Mi no por kere ku el a bai". Despues di un bishita kórtiku i siguiendo ku un orashon, e hómber a bisa na e minister: "Semper mi a bisa ku no tin Dios, ni mi no tabata kere den un Kreador. Ma awe nochi ora mi tabata para mi so aki den mi kamber, mi tabata mira den un spil i mi a wak mi mes komo un ser bibu, un persona ku ta hala rosea i ta move, mi a bisa: "Mester tin un Dios. Un hende mester a trahá mi i siguramente lo mester tin un resurekshon. Mi ke duna mi kurason na Dios".

HOBENNAN POR SPERA PA KOMPRONDE E PLAN DI DIOS?

15. "I ku di mucha kaba bo konos'é e Skritura Santu, ku por hasi bo sabí pa wordu salbá pa medio di fe den HesuKristu"(2 Timoteo 3:15).



16 Pasobra Dios ta Kreador, kiko E ta spera di Su yunan?

"Laga nos tende e konklushon di tur e asuntu. Teme Dios i warda Su mandamentunan: pasobra esaki ta e deber di tur hende" (Eklesiastés 12:13).

Pasobra DIOS ta nos Kreador, ta nesario pa nos obedes'E i konfi'E. E sa kon nos ta trahá i kiko e futuro lo trese. E sa loke ta mihó pa nos. E lo asepta bo komo Su yu i lo protehá bo i warda bo si bo ke determinó awor mes, ku Su ayuda, pa obedes'E, pasobra manera nos versikulo ta bisa,

"Esaki ta deber di tur hende".

"E ta aplikabel na kada persona".

